

四庫全書

史部

欽定四庫全書

史部

續資治通鑑長編卷九十六至

詳校官檢討臣劉錫五

刑部郎中臣許兆椿覆勘

纂修官檢討臣張家駒

謄錄貢生臣王兆泰

欽定四庫全書

續資治通鑑長編卷九十六

宋 李燾 撰

真宗

天禧四年秋七月庚戌朔先天節羣臣上壽涇王元儼攝太尉以未命宰相故也 呂夷簡等還自東西川言

梓州路勸農使王驥知梓州蘇維甫知邛州沈同知蜀州錢昆知昌州張用通判益州狄棐劉隨通判永興軍

董希甫知益州靈池縣李紘堪充三司臺省轉運提調
刑獄藩郡之職詔有司記其姓名代還日升陟任使駿
臨城人大中祥符初舉進士授婺州觀察推官代還上
見其狀貌奇偉特遷著作佐郎同錢塘人昆易之兄裴
長沙人紘昌齡從子也

蘇維甫張用董希甫三人未詳邑里

西南蕃千

三百人來貢

丙辰遣使市小車給鳳翔府至綿州驛遞軍士仍為增
葺廬舍憫其勞也韓億使淮南江浙還言池州青陽

縣旌表門閭方鋼狀稱籍管稅錢四百餘千米二千五百斛同居七百口凡八世四百年景德中準詔旌表而本縣科率一無寬假望蠲其戶下雜配物詔本州凡有科率量優減之

丁巳太白晝見

辛酉召宗室近臣及太子太傅寇準兵部尚書馮拯觀

苑中嘉穀遂宴於玉宸殿

隆平集言準罷相以太子太傅歸班請對不許據此則嘗

從後苑遊觀矣錢惟演日記七月十二日召給諫舍人及太子太傅等入承明殿先賜食訖召入玉宸殿看瑞

穀先于太清樓見訖賜茶便詣
種穀處按此則隆平集誤也

知制誥呂夷簡言伏

見河再決滑州計功鉅萬以臣所見未宜修塞俟一二年間漸收稍芟然後興功兼聞諸州有賤易莊田者蓋慮不時科率無從出辦望降明詔諭以河決未議修塞仍令滑州規度所須稍芟以軍士採伐或於旁近秋稅折納從之遂詔京東西河北路經水災州軍勿得科調丁夫其守捍隄防役兵仍令長吏並加存卹番休之

癸亥對參知政事李迪兵部尚書馮拯翰林學士錢惟

演于滋福殿寇準罷上欲相迪迪固辭於是又以屬迪
有頃皇太子出拜上前曰蒙恩用賓客為相敢以謝上
顧謂迪曰尚復何辭耶是日惟演又力排寇準曰準自
罷相轉更交結中外求再用曉天文卜筮者皆遍召以
至管軍臣僚陛下親信內侍無不着意恐小人朋黨誑
惑聖聽不如早令出外上曰有何名目惟演曰聞準已
具表乞河中府見中書未除宰相兼亦聞有人許以再
用遂不進此表上曰與河中府何如惟演乞召李迪諭

旨上曰李迪何如惟演言迪長者無過只是才短不能制準因言中書宜早命宰相上難其人惟演對若宰相未有人可且著三兩員參知政事上曰參政亦難得人問今誰在李迪上惟演對曹利用丁謂任中正並在李迪上上默然惟演又言馮拯舊人性純和與寇準不同上亦默然既而曰張知白何如惟演言知白清介使參政則可恐未可為宰相上頷之惟演又言寇準宜早令出外準朋黨盛王曙又其女婿作東宮賓客誰不畏懼

今朝廷人三分二分皆附準矣臣知言出禍從然不敢
不言惟陛下幸察上曰卿勿憂惟演再拜而退後三日
拯遂拜樞密使蓋用惟演之言也廸既除宰相而準為
太子太傅萊國公如故

甲子大雨流潦泛溢公私廬舍大半有壓死者是月連
雨而此夕為甚

乙丑令京東西河北州軍津渡官給舟船濟人

丙寅以禮部侍郎參知政事李廸為吏部侍郎兼太子

少傅平章事兵部尚書馮拯為樞密使吏部尚書同平章事是日告謝即賜襲衣金帶鞍勒馬正謝日亦如之非常比也 以霖雨壞營舍賜諸軍緡錢

丁卯禁兩川諸縣弓手雇人代役犯者許鄰保糾告重繩之 詔獎益州官吏趙稹等以呂夷簡言其政績也戊辰判杭州王欽若酒榷增羨獄空詔獎之

先是馮拯以兵部尚書判都省上欲加拯吏部尚書參知政事召學士楊億使草制億曰此舍人職也上曰學

士所職何官億曰若樞密使同平章事則制書乃學士所當草也上曰即以此命拯拯既受命樞密院領使者凡三人前此未有人皆疑怪曹利用丁謂因各求罷上徐覺其誤召知制誥晏殊語之將有所易置殊曰此非臣職也遂召錢惟演惟演入對曰馮拯故參知政事今拜樞密使當矣但中書不當止用李迪一人蓋遷曹利用或丁謂過中書上曰誰可惟演曰丁謂文臣過中書為便又言王清昭應宮未有使謂首議建宮宜即令領

此又言曹利用忠赤有功國家亦宜與平章事上曰諾

庚午以樞密使吏部尚書丁謂平章事樞密使檢校太

尉曹利用加同平章事皆用惟演所言也

此段參取錢氏及司馬氏

日記修入晏殊誤召恐不至再當考馮拯自兵書加吏書必參政日記偶脫今追填之楊億所云此舍人職蓋參政制乃舍人所當草也

辛未廊延路鈐轄言普密族馬鄂克等先為北界所略今

帥衆來歸

壬申以久雨詔諸軍校營在新城者權免常朝賜諸班

直軍營壓死者緡錢有差 河北轉運使言懷衛二州
仍歲災沴流民漸復請各增置通判一員以安集之詔
可 上既從錢惟演之言擢丁謂首相加曹利用同平
章事然所以待寇準者猶如故謂等懼謀益深是日準
入對具言謂及利用等交通蹤跡又言若有罪當與李
迪同坐不應獨被斥上即召迪至前質之兩人論辯良
久上意不樂迪再三目準令退及俱退上復召迪入對
作色曰寇準遠貶卿與丁謂曹利用並出外迪言謂及

利用須學士降麻臣但乞知一州上沈吟良久色漸解
曰將取文字來迪退復作文字却進上遽洒然曰卿等
無他且留文字商量更召謂入對謂請除準節鉞令出
外上不許

此據錢惟演記刪修準迪謂入對皆二十三日也

越明日楊崇勲等

遂告變周懷政伏誅又三日準乃遠貶

甲戌昭宣使英州團練使入內副都知周懷政伏誅大
中祥符末上始得疾是歲仲春所苦浸劇自疑不起嘗
卧枕懷政股與之謀欲命太子監國懷政實典左右春

坊事出告寇準準遂請間建議密令楊億草奏已而事泄準罷相丁謂等因疎斥懷政使不得親近然以上及太子故未即顯加黜責懷政憂懼不自安陰謀殺謂等復相準奉帝為太上皇傳位太子而廢皇后與其弟禮賓副使懷信潛召客省使楊崇勲內殿承制楊懷吉閤門祇候楊懷玉議其事期以二十五日竊發前是一夕崇勲懷吉夕詣謂第告變謂中夜微服乘婦人車過曹利用計之及明利用入奏於崇政殿懷政時在殿東廡

即令衛士執之

懷政本傳云上姑務舍客不忍斥其過然漸疎遠懷政憂懼時使小黃門自禁

中出詐稱宣召入內東門坐別室久之而出以欺同輩實錄亦云然收懷政時實在崇政殿東廡則其出入禁中固自如也但丁謂等多為之防使懷政罕得見上爾蓋未有疎遠懷政意也本傳又云上怒甚而實錄無此疑本傳飾詔宣徽北院使曹瑋與崇勳就御藥院鞠訊說今不取

不數刻具引伏上坐承明殿臨問懷政但祈哀而已命載以車赴城西普安佛寺斬之謂等并發朱能所獻天書妖妄事亟遣入內供奉官盧守明鄧文慶馳驛詣永興軍捕能及其黨乾祐觀主王先道士張用和殿直劉

益借職李貴康王殿侍唐信徐原並免死黥面配儋梅
高崖雷瓊萬安循州懷政父內殿承制紹忠及懷信並
決杖配復岳州子姪勒停資產沒官懷政之未敗也紹
忠嘗詒之曰斫頭豎子終累及我懷信又嘗謂懷政曰
兄天書事必敗當早詣上首露庶獲輕典及謀作亂又
號泣伏拜而止之皆不聽故皆得免死焉右街僧錄澄
預聞妖妄黥面配郴州朱能父左武衛將軍致仕諤母
周氏贖銅百斤并其子守昱守吉分配蔡郡道州貲產

沒官與諤往來結社人悉決杖配諸州自餘親事卒懷

政僕使決杖分配海島遠州部下使臣第降秩

記聞載懷政以

二月二日懷小刀對上自割上因是疾復作皇后命收懷政下獄并于宮中得懷政奏言傳位事乃命楊崇勳

告變誅懷政貶萊公按懷政誅在七月萊公罷在六月若懷政于仲春為此則萊公必不待夏末始罷懷政至秋

初乃誅也然真宗實錄以仲春疾益甚不知緣何事爾記聞必誤今不取懷政既誅有欲并

責太子者上意惑之李迪從容奏曰陛下有幾子乃為

此計上大寤由是東宮得不動搖迪之力居多

此據記聞

丁丑太子太傅寇準降授太常卿知相州翰林學士盛

度樞密直學士王曙並落職度知光州曙知汝州皆坐
與懷政交通而曙又準壻也準親吏張文質賈德潤並
黜為普寧連山縣主簿及朱能敗又除名配隸封貴州
朝士與準親厚者丁謂必斥之楊億尤善準而請太子
監國奏又億所草也及準敗丁謂召億至中書億懼便
液俱下面無人色謂素重億無意害之徐曰謂當改官
煩公為一好詞耳億乃稍安卒保全之當時宰相愛才
如此謂雖姦邪議者亦以此稱焉

宰相愛才此據
歐陽脩歸田錄

是月以客省使英州防禦使楊崇勲為鄧州觀察使內
殿承制楊懷吉為如京使並賜金帶及金銀降詔褒獎
供奉官京城西面巡檢楊懷玉責授侍禁依前閤門
祇候出為杭州都監懷玉既與崇勲等預懷政議崇勲
告變之翼日始詣樞密院自陳故責之

八月辛巳以楊崇勲為內客省使領貴州觀察使兼羣
牧使崇勲累辭鄧州之命故改任焉 入內供奉官譚
元吉高品王德信決杖配唐州高班胡允則黃門楊允

文決杖配西京坐嘗受命至乾祐縣與周懷政協同妖
妄故也元吉尋黥面配賓州

太子太保判杭州王欽若自以備位東宮請入朝甲申
召之欽若尋又言詔無馳驛之文但依程即路始令乘
傳徙知相州太常卿寇準知安州初李迪與準同在
中書事之甚謹及準罷丁謂意頗輕迪於是謂等不欲
準居內郡白上欲遠徙之上命與小州謂退而署紙尾
曰奉聖旨除遠小處知州迪曰向者聖旨無遠字謂曰

君面奉德音欲擅改聖旨以庇準耶二人忿鬪蓋自此始朱能聞使者至自度不免裹甲以出殺盧守明帥所部兵挈家屬叛逸永興軍奏其事詔遣內殿承制江德明入內供奉官于德潤乘驛發兵捕之應能黨與分配嶺表者所至禁繫別俟朝旨既而能衆潰勢窮蹙入桑林自縊死永興乾耀都巡檢供奉官李興牢城十將張順斷能及其子首以獻補興閤門祇候順本城都頭

興順遷陟在十一月甲寅今并書之

乙酉以樞密副使任中正禮部侍郎王曾並參知政事
翰林學士錢惟演為樞密副使 刑部請自今犯賊濫
配隸經恩從便者俟一年後遇赦宥方理 工部郎中
姜遵言陝西利夔等路州軍多無常平倉或歲歉賑糶
即發軍糧望令創置量民數蓄穀詔可

丙戌謁玉清昭應宮景靈宮幸開寶寺

辛卯以太常丞直龍圖閣馮元為左正言兼太子右諭
德初太子為壽春郡王王旦薦元宜講經資善堂帝以

元少更用崔遵度於是遵度卒乃命元代之詔諸路
勸農提點刑獄官自今奏事緣戶賦農田則署勸農司
刑獄格法則署提點刑獄所

戊戌示宰相王宸殿瑞穀圖

庚子同判太常禮院陳寬言郊廟致齋日左右街司承
例遣雜職從行望自今罷之其祇事人吏不謹職者俟
事畢付司科罷從之

壬寅太常卿知安州寇準坐朱能叛再貶道州司馬制

辭云不務敦脩密朋凶慝辱予輔弼玷乃搢紳仍以其
事傳告諸州御史臺揭榜朝堂準過零陵踰大坡護兵
先後不屬溪洞蠻夷乘間抄掠其酋長聞而責之曰奈
何奪賢宰相行李耶趨遣人還所掠其在道州晨具朝
服如常時起樓置經史道釋書暇則誦讀賓至笑語若
初無廊廟之貴者自準罷相繼以三黜皆非上本意歲
餘上忽問左右曰吾目中久不見寇準何也左右亦莫
敢對上崩乃責雷州

此據司馬光記開丁謂傳云周懷
政事敗議貶準帝意欲謫準江淮

間謂退而除道州司馬獨王曾以帝語質之謂顧曰居
停主人勿復言蓋指曾以第舍假準也按居停之語在
仁宗初再貶雷州時曾緣此遂謀去謂龍川別志當得
之以聖旨質謂乃李廸其事見記聞今從之若此時曾
已詰謂則當廸謂忿爭時曾亦必不助謂矣國史恐誤
也徐度國紀天禧四年十二月癸丑對輔臣及王欽若
於宣和門北閣子中上曰朕覺四體不康丁謂等奏近
日聖躬稍安況中外無事乞寬聖心欽若奏今來中書
密院公事甚好又出寇準朝廷更無事矣上云除却寇
準後甚靜又問寇準何在宰臣曰在道州上曰輕典馮
拯曰如準包藏禍心漢唐之法皆當族誅陛下蓋是寬
貸上曰朕曲全之於是上色稍怡命坐賜茶而罷不知
徐度何從得此恐必
不然今附見當考

癸卯以衛尉卿填從吉為光祿卿致仕司封郎中兼侍

御史知雜事杜堯臣改衛尉少卿知陝州皆坐與寇準親善也 右司諫直集賢院判戶部勾院劉暭為工部

員外郎兼侍御史知雜事初河決滑州大興力役道殍

相望暭請策免宰相以答天變時寇準丁謂實在中書

及王曙坐準貶官在朝無敢往見者暭歎曰朋友之義

獨不行於今日歟往餞之經夕而還謂亦不罪也

河決乃三

年六
月事

甲辰賜諸班直諸軍洎太子宫祇候已下器帛緡錢

入內押班鄭志誠嘗納朱能音問及搜獲表章有請去
子親政之辭令右諭德魯宗道御史劉平鞠問削兩任
配隸房州

乙巳詔故相向敏中家產日廢令內侍省官檢校之
丙午入內供奉官石承慶削兩任配隸宿州先是周懷
政嘗遣人召承慶欲有所議夜二鼓不下皇城門鑰以
待之上遣黃門黃守志開大寧祥符東華門傳詔許王
宮至則門不閉見承慶將入守志訊知其故戒令勿入

於是門司不復納承慶守志畏懷政不敢言至是以聞
鞠承慶而責之

是月詔自今逐年兩稅版籍並仰令佐躬自勾鑿點檢
勘新收舊管之數民有典賣折戶者驗定舊稅明出戶
帖勸農使按部所至索視帳目其縣官能用心者批歷
為勞績當議升獎時上封者言諸州版籍止委吏人失
於勘驗移易稅賦多不均等故有是命尋又詔前敕諸
路勸農使所至究民間疾苦檢視帳籍慮其因緣取索

受越訴以擾民宜令使副常切鈐束不得妄有行遣呼
集其籍帳不整止移牒索視論訴公事並依舊次第陳
狀如已經州縣轉運司不行者並即時盡公處理所置

曹典勿得過提點刑獄司數

此據會要
或削去

九月己酉以諫議大夫兼太子右庶子知開封府王隨
為給事中知杭州曾靈觀判官兵部員外郎知制誥呂
夷簡為刑部郎中龍圖閣直學士權知開封府隨嘗假
周懷政白金五十兩至是自言故出之夷簡治開封嚴

辨有聲上識其姓名於屏風意將大用之也

隨本傳云
隨坐此奪

知制誥按隨二年八月遷左諫議
兼右庶子即罷知制誥矣傳誤

錄故翰林學士右

諫議大夫梁顥子適為祕書省正字適詣登聞自陳父

兄淪沒特有是命 詔翰林侍讀學士張知白玉清昭

應宮副使林特三司使李士衡龍圖閣學士陳堯咨樞

密直學士薛映李及馬元方張士遜兵部侍郎馬亮給

事中李應機王隨右諫議大夫段暕各舉常參官堪錢

穀任使者二人工部尚書晁迥翰林學士楊億劉筠晏

殊龍圖閣直學士呂夷簡戶部侍郎李維知制誥李諮
宋綬張師德各舉文學優長履行清素者二人給事中
樂黃目孫奭右諫議大夫趙稹龍圖閣待制李虛已李
行簡少府監薛顏太常少卿趙湘各舉可守大藩者二
人知制誥祖士衡錢易知雜御史劉晔直龍圖閣魯宗
道馮元各舉堪御史者二人諸路轉運使副勸農使各
舉幕職州縣官堪京官知縣者二人限十日內具名以
聞

庚戌前同谷縣主簿李士程伐登聞鼓上軍機密事以
所言狂悖責授惠州司戶參軍

壬子以王清昭應宮副使尚書右丞林特為工部尚書
兼太子賓客副使如故

丙辰復御崇德殿視事上自中春不豫止視事於長春
殿至是聖體和平始御前殿 詔劉益康王徐原等十
一人並活釘令衆三日訖斷手足具五刑處死王光李
貴並斷手足處斬唐信八人並處斬文思院畫匠軍士

百姓十五人並免死杖脊黥面配沙門島及廣南牢城
朱能僕使及道士軍士十二人並杖脊配江湖福建牢
城能弟文顯免杖黥面配鄧州本城初能將掇甲扞制
使文顯潛以告知府朱巽等故至是獲用輕典能妻高
母李弟婦陳洎女僕家僮十二人並決杖分配湖南京
東西州軍能子伴哥以幼不勝杖黥面配澧州牢城聽
隨母之配所時命殿中侍御史王博文與內臣岑守素
等乘傳詣永興按劾具獄以聞而降是詔初遣博文人

謂連逮者必衆博文惟治首惡脅從者皆為請得以減

論

本傳云博文惟治首惡脅從者七人皆為請得以減論所稱七人與實錄不合今削去

已未以久雨放朝十日輔臣對於便坐以樞密副使

周起為戶部侍郎知青州簽署樞密院事曹瑋為宣徽

南院使環慶路都部署兼管勾秦州兵馬起素善寇準

而瑋亦不附丁謂謂惡之并指為準黨故俱罷出起性

樂易好飲酒準前在中書嘗與起過瑋家飲同列多先

去者準及起盡醉夜漏上乃歸翌日引咎伏謝上笑謂

曰天下無事而大臣和樂何過之有然起謹密凡奏事

及答禁中所問隨輒焚草故其言外無知者

徐度國紀云九月已

未樞密院奏事上獨留曹利用及曹瑋問瑋曰汝安得與朱能交通瑋曰臣實不識能當是以臣有虛名於西鄙欲借臣虛名耳因泣涕請出上憐之謂利用曰瑋可改官今出乃以為宣徽南院使環慶都部署不知何據

附見
當考

辛酉命知制誥宋綬為契丹國主生辰使閤門祇候譚倫副之太子左諭德魯宗道為正旦使閤門祇候成吉副之

壬戌知永興軍府給事中集賢院學士朱巽陝西轉運使工部郎中直集賢院梅詢並削一任巽為護國節度副使詢為懷州團練副使並不署州事轉運使度支員外郎劉楚降授祠部員外郎監葉縣鹽稅勸農使職方員外郎皇甫載時丁憂候服闋與通判副使閣門祇候程紹忠為陽武縣都監本軍通判幕職官並贖銅釋其罪巽等嘗薦舉朱能及不察姦妄致害制使故責之知鳳翔府侍御史臧奎贖銅二十斤通判寧州尋換都官

負外郎坐與能交結也永興軍部署李福者嘗任防禦使將兵失律流嶺外起為環衛在永興善事寇準後因郊祀驟復祁州防禦使能叛不即擒捕憫其衰老授左屯衛將軍致仕都監閻門祇候康文德削職監陝州鹽稅殿直閻門祇候穆介與能善能及周懷政嘗連狀薦之杖脊黥面配韶州牢城軍士封進鳳翔府孔目官朱日昌等八人皆能等常從預為矯妄者並決杖分配海島遠郡牢城乾祐知縣蒲城長安萬年乾祐簿尉並坐

絀削

丁卯赦天下繫囚除十惡已殺之官典犯賊盜官物持
仗放火偽造符印外咸除之天禧三年已前所逋夏秋
稅貸糧種子見欠倚閣者並與蠲除周懷政朱能干連
黨類除已行勘斷外自餘咸許自新一切不問

已已遣鹽鐵判官劉錯乘傳詣永興軍安撫軍民搞設
官吏將士 詔文武官辭見謝合過正衙及幕職州縣
官對敕衙謝在放朝假內者並放當升殿奏事者實封

以聞

庚午京東勸農使言決河浸徐州知州駙馬都尉王貽貞作隄城南以捍水患甚固詔獎之

先是詔翰林學士劉筠等試諸州續解進士辛未筠等上其名凡五十六人其十九人授三班奉職二十九人借職八人當授諸州長史司馬特補借職並與家便差遣

壬申賜京城酺 太子太保王欽若自杭州來朝令入

赴內殿起居

甲戌給事中知河陽縣孫奭言父戶部郎中致仕翌年九十按禮文九十者其家不從政令父母八十者許解官侍養望許退歸田里優詔不許王欽若請江淮制置使罷雇民船兩浙淮南權罷和糴聽商旅入中並從之

冬十月戊寅朔中書門下言唐朝故事五日一開延英隻日視事雙日不坐方今中外晏寧政刑清簡望準舊

制三日五日一臨軒聽政或隻日視事雙日不坐至於
刑章錢穀事務遣差承受臣僚除急切大事須面對外
餘並令中書樞密院附奏詔下禮儀院詳定乃請自今
雙日前後殿不坐隻日視事或於長春殿或於承明殿
應內殿起居群臣並依常日起居餘如中書門下之奏
俄又請隻日御承明殿常朝依假日例便服視事不鳴
鞭詔可

己卯資善堂上梁皇太子會官僚觀之太子太保王欽

若承詔旨預焉

記聞云云具
十二月丁酉

壬午御正陽門觀酺皇太子侍坐凡五日上自不豫罕
復臨幸至是人情歡忭

戊子禮儀院言每歲十月十五日朝拜景靈宮今緣祭
神州地祇奏告在散齋之內請權罷朝拜至日令宮使
行酌獻之禮從之

己丑以前起居郎直史館陳堯佐免持服知滑州時三
司使李士衡言滑州方召徒築隄堯佐素幹事望專委

之故有是命堯佐創水龍以殺水怒堤乃可築既又作
長隄以護之人號為陳公堤三班奉職王貴配隸汀
州坐嘗齎朱能周懷政音問徃復也左巡使殿中侍
御史王耿言諸州軍負罪散參軍安置人多在處卜居
雖遇量移亦不遷徙蓋緣失官之後恣營生計不革貪
心侵擾貧民規求貨利又或持州郡公事長吏稍懦則
不能制之深為民患請自今委本處常切覺察如侵擾
官事抑欺百姓即奏移別所仍令州縣長吏非時不得

接見從之

辛卯詔注釋御集檢閱官月增給錢七千京官五千

壬辰以太子太保王欽若為資政殿大學士仍令日赴

資善堂侍皇太子講讀

十二月
己丑

癸巳祕書郎館閣校勘王舉正等請自今遇慶節依京

官校理檢討例綴百官進奉上壽從之

舉正化
墓子

甲午賜天下宮觀大中祥符降聖記各一本

戊戌以淮安鎮界六族都軍主乞理補三班借職充蕃

部巡檢以廊延鈴轄周文質言其勤效也 開封府獄

空詔獎呂夷簡等 權判吏部流內銓陳堯咨言近准

赦放選投狀選人併多其間有司士文學諸色出身流
外人入官資序已定向來承例引對虛煩聖聽請自今
比類未入令錄者更不引對依格注擬從之

甲辰詔經雨及河水衝浸秋苗宜令三司據諸處檢覆
到合放分數外依赦文更放一分其已放九分者悉蠲
之

丙午召皇太子宗室近臣赴玉宸殿翠芳亭觀稻遂賜宴太常寺太祝丁珣為內殿崇班從其父宰相謂所乞也

十一月壬子陳堯咨又言幕職闕員百餘見集人資序應入者少欲以令錄有出身人無過犯者權充代還理本資序詔令錄初仕者權初等幕職兩任者權節察推官軍事判官

癸丑對輔臣及王欽若於宣和門賜御製會靈觀銘石

本各一

甲寅王清昭應宮副使工部尚書兼太子賓客林特請
皇太子不答拜詔不許

乙卯令勸農使兼提點刑獄官自今以提點刑獄勸農
使副為稱 修尚書省命龍圖閣學士陳堯咨總其事
戊午以三司度支副使工部郎中寇瑊為右諫議大夫
集賢院學士知益州時上封事者言趙稹不曉民情好
自尊大與衆不協故代之降稹知同州 上御龍圖閣

召近臣觀聖製文論歌詩上曰朕聽覽之暇以翰墨自娛雖不足垂範亦平生遊心於此丁謂等言聖製廣大宜有宣布請鏤板以傳不朽許之遂宴於資政殿

庚申內出聖製七百二十二卷示輔臣

壬戌宰臣等言聖製已約分部秩望令雕板摹印頒賜館閣及道釋經藏名山勝境乃命內臣規度禁中嚴淨之所別創殿閣緘藏詔可尋於龍圖閣後修築命入內都知張景宗副都知鄧守恩管勾是為天章閣又言

陛下臨御以來功業隆盛望令中書樞密院取時政記
中盛美之事別為聖政錄從之仍令樞密副使錢惟演
參知政事王曾編次丁謂等參詳

甲子宰臣李迪等上刪定一司一務編敕三十卷左
巡使殿中侍御史王耿言自今臺官因譴累降差充知
州仍舊外其充通判及監當官請比品授以他官從之
乙丑對輔臣於承明殿上曰朕邇來寢膳頗漸康復然
軍國之事未免勞心今太子年德漸成皇后素賢明臨

事平允深可付託欲令太子莅政于外皇后居中詳處
卿等可議之輔臣進曰臣等所奉德音實邦家之大慶
況太子升儲以來德望日隆皇后輔翼歲久中外遵教海
內瞻企人無間言然太子既監總朝政望令中書樞密
院大臣各兼東宮職任庶日奉謀議便於翼贊上許之
於是退議其等列傳旨命學士草制詔可自冠準貶斥
丁謂浸擅權至除吏不以聞李廸憤懣嘗慨然語同列
曰廸起布衣十餘年位宰相有以報國死且不恨安能

附權臣為自安計乎及議兼職時迪已帶少傅欲得中書侍郎尚書謂執不可遂草熟狀謂加門下侍郎兼少師迪加中書侍郎兼左丞曹利用加檢校太師馮拯加檢校太尉並兼少保任中正加右丞錢惟演加兵部侍郎並兼賓客王清昭應宮副使工部尚書林特樞密直學士右諫議大夫張士遜先兼太子賓客並改詹事翰林學士戶部員外郎晏殊先兼舍人改左庶子餘官悉如故故事兩省侍郎無兼左右丞者而迪舊人亦當遷

尚書謂專意抑迪不堪變色而起丙寅晨朝待漏謂
又欲以特為樞密副使仍領賓客迪曰特去歲遷右丞
今年改尚書入東宮皆非公選物議未息况已奏除詹
事何可改也因詬謂引手板欲擊謂謂走得免同列極
意和解不聽遂入對於長春殿內臣自禁中奉制書置
榻前上曰此卿等兼東宮官制書也迪進曰臣請不受
此命因斥謂姦邪弄權中外無不畏懼臣願與謂同下
憲司置對且言昨林特子在任非理決罰人致死其家

詣闕訴寃寢而不理蓋謂所黨庇人不敢言又曰寇準無罪罷斥朱能事不當顯戮東宮官不當增置又錢惟演亦謂之姻家臣願與謂惟演俱罷政柄望陛下別擇賢才為輔弼又曰曹利用馮拯亦相朋黨利用進曰以片文隻字遭逢聖世臣不如迪奮空拳捐軀命入不測之敵迪不如臣也上顧謂曰中書有不當事耶謂曰願以詢臣同列乃問任中正王曾皆曰中書供職外亦無曠闕事項之謂迪等先退獨留樞密使副議之上怒甚

初欲付御史臺利用拯曰大臣下獄不惟深駭物聽況
丁謂本無紛競之意而與李迪置對亦未合事宜上曰
曲直未分安得不辨既而意稍解乃曰朕當即有處分
惟演進曰臣與謂姻親忽加排斥願退就班列上慰諭
久之乃命學士劉筠草制各降秩一級罷相謂知河南
府迪知鄆州制書猶未出丁卯迪請對於承明殿又請
見太子于內東門其所言蓋不傳而謂陰圖復入惟演
亦恐謂出則已失援白上欲留之并請留迪因言契丹

使將至宰相絕班馮拯舊臣過中書甚便若別用人則

恐生事上可之

廸對承明不知言何事而實錄正史皆不載今特表而出之

戊辰命謂以工部尚書廸以戶部侍郎歸班事頗迫遽

其制詞舍人院所草也筠所草制訖不行

百官表謂以戶書知河南

廸以戶侍知鄆州皆係戊辰日

是日惟演及中正曾等並如初議遷秩

領東宮而太子議政詔書及拯利用等制皆格已已謂

入對於承明殿詰所爭狀謂曰非臣敢爭乃廸忿詈臣

爾臣不當與之俱罷願復留遂賜坐左右欲設墩謂顧

曰有旨復平章事乃更以杕子進於是入內都知張景宗副都知鄧守恩傳詔送謂赴中書令依舊視事仍詔廸出知鄆州放朝辭即時赴任時已命學士劉筠草制以拯為相領王清昭應宮使昭文館大學士制入而未出也謂既復相其制亦卒不行謂始傳詔召劉筠草復相制筠不奉詔乃更召晏殊筠既自院出遇殊樞密院南門殊側面而過不敢揖蓋內有所媿也先是上久不豫語言或錯亂嘗盛怒語輔臣曰昨夜皇后以下皆之

劉氏獨留朕於宮中衆皆不敢應廸進曰果如何不以法治之良久上寤曰無是事也后適在屏間聞之由

是惡廸所以不得留非但謂等媒孽亦中宮意爾

拜罷錄云

廸欲兼右丞王曾等以為不可又云廸語極喧戾上連叱之又云上稱廸無禮又云時契丹使將至宰相絕班且欲復相謂錢惟演請並留廸王曾等言謂無過曲在廸請令出三兩月復召之此皆陳繹私意曲筆與正史實錄及諸家書並不合今不取獨所云惟演請并留廸或不妄蓋廸與謂初並出守尋復留不知何故當是從惟演議耳然惟演實為謂計當時不得已且并留廸故謂卒留而廸竟出也龍川別志載二相忿爭事與實錄正史不同且云劉筠辭不草制乃命錢惟演按此時惟演已副樞密別志誤矣記聞亦以為草制者惟演也今

皆不取然留丁謂出李迪其謀實自惟演但不當草制而草制者實晏殊也御史臺記劉筠傳云十一月丙辰除丁謂兼少師李迪兼少傅馮拯與曹利用並兼少保筠當制麻入未宣迪謂怨爭于帝前戊辰筠復直謂罷為戶書知河南迪罷為戶侍知鄆州拯為昭文曾為集賢制既入謂復留要筠改制筠不從卒令他學士為之拯遂為集賢曾依舊為副樞北記傳載王曾事與他書不同當考宋綬作筠墓銘亦云上在東宮始議邦政以樞輔備三孤筠當上麻入而事遽易丞相要筠改詔筠拒不往卒用他學士為之然則迪謂等初領東宮職及罷相兩制皆筠所草也

是日大風揚塵晝晦以樞密副使錢

惟演為都大管勾祥源觀公事惟演先領會靈觀使於

是乞改命故臣故特置此職

庚午詔自今中書樞密院諸司該取旨公事仍舊進呈外其常程事務委皇太子與宰臣樞密使已下就資善堂會議施行訖奏皇太子上表陳讓優詔不允初議欲令太子總軍國事丁謂以為不可曰即日上體平朝廷何以處此李迪曰太子監國非古制耶力爭不已迪既罷出故有是詔

迪本傳以為此詔在迪未罷相時蓋悞也考十八日上對輔臣語則可知此詔

與昨詔異矣

吏部尚書平章事丁謂加左僕射門下侍郎

兼太子少師樞密使同平章事馮拯為右僕射中書侍

郎兼少傅平章事樞密使同平章事曹利用兼少保
辛未中書樞密院上言自今百官五日於長春殿起居
其餘隻日視朝請御承明殿或其日不坐則令閤門傳
宣放朝從之

壬申皇太子見宰相樞密使於資善堂諸司職掌以次
參謁 契丹遣使霸州節度使蕭阿括副使利州觀察
使耿元吉來賀承天節

甲戌翰林學士太子左庶子晏殊禮賓副使太子宫祇

楊懷玉上新編賜東宮御製五十卷時輔臣論次御集
乞降賜皇儲文字遂命懷玉編錄懷玉請令殊同纂集
至是來上

十二月丁丑朔起復翰林學士楊億卒錄其子鉉為奉
禮郎億天性穎悟自幼及終不離翰墨文格雄健自唐
大中後詞氣衰濫國朝稍革其浮至億乃振起風采與
古之作者方駕矣文思敏速不凝滯對客談笑揮毫無
廢而精密有規裁不煩不艷善細字起草一幅數千言

不加點竄於時學者翕然宗尚名聞外夷書無不覽善
強記尤長典章制度之事時多取正蓋一時文字之冠
也喜誨誘後進賴以成名者甚衆聞人有片辭可紀必
為諷誦手集當世之事述為筆苑時文錄數十編重交
遊耿介坦夷敦尚名節多周人急所得廩賜隨盡談吐
有味評品人物善惡大明留心釋氏禪觀之學自屬疾
即屏葷茹臨終前一日為空門偈頌識者稱其達觀云
已卯給祥源觀公用錢月五十千

甲申徙河北轉運使工部郎中黃昭益知鄧州屯田郎中李放知密州以部內折納過差也

乙酉賜涇王元儼銀五千兩宗室防禦使各千兩團練使八百兩餘各有差又賜太子少師丁謂少傅馮拯少保曹利用各五千兩賓客任中正錢惟演王曾太保王欽若詹事林特三千兩左庶子晏殊詹事張士遜各二千兩諭德魯宗道馮元各千兩自餘官臣常從各有差又賜殿前副都指揮使蔚昭敏錢四百萬步軍都指揮

使馮守信三百五十萬殿前都虞候夏守恩馬軍都虞候劉美各三百萬四廂都指揮使諸班諸軍都虞候而下視月俸給之以皇太子親政行慶也 詔自今中使傳宣齋手詔諭文字赴中書樞密院係遷秩加恩事並先赴入內都知司上籍覆奏訖乃給付施行 詔中書樞密院自今內臣傳旨處分公事並須覆奏令中書提點五房堂後官樞密院承旨而下自今月十三日後從宰臣樞密使資善堂祇候 中書樞密院上言請自今

遇隻日承明殿不視事則入內都知傳宣中書樞密院
詣太子資善堂議事應時政及後殿軍頭司公事素有
定制者施行訖奏係遷改陞降者送中書樞密院進呈
取旨如無公事則宰臣樞密使已下遇參辭謝皇太子
許三二人已上為一班詣堂延見自餘官僚並止留膀
子詔從之自是輔臣每會議皇太子秉笏南面而立中
書樞密院以本司事遞進承令旨時政之外京朝幕職
州縣官使臣禁卒咸引對焉事畢接見輔臣如常禮

太常禮院言準御史臺狀向來京朝官承制并丁父母
憂持服五十四月今詳定歷代典禮父母併亡或相繼
而沒有重輕兼服之制遇虞祔練祥之祭各服齊斬之
服則是隨先後而除之無五十四月之制自今文武官
併丁父母憂者請令依禮隨先後除服詔可 開封府
言準近詔大辟罪遇十月權住斷遣過天慶節依舊行
刑雜犯死罪並春夏並禁繫聞奏竊緣本府日有重囚
在獄淹久欲望自今依舊逐日區斷諸州軍亦準此從

之樞密院言契丹使自雄州至京館舍給使臣諸司人例物比每歲稍厚欲令國信使宋綬等至北界諸司人例物亦與加給從之

丁亥龜茲可汗王智海甘州輝和爾各遣使來貢智海仍貢大尾羊二

己丑以資政殿大學士太子太保王欽若為司空職如故欽若求侍東宮講讀以輔臣兼領三少品序非便表求換秩遂改命之止立學士班

十月
壬辰

賜故秦州蕃僧

努卜諾爾弟子莽布瑪喇幹紫衣以本州鈐轄言其幹事故也

庚寅詔中書樞密院每赴資善堂議事止令張景宗一員侍皇子餘悉屏之

辛卯大理寺丞王雍上其父旦文集擢雍為太子中允丁酉以資政殿大學士司空王欽若為山南東道節度使同平章事判河南府初欽若與丁謂善援引至兩府及謂得志稍叛欽若欽若恨之時上不豫久事多遺忘

欽若先以太子太保在東宮位三少上謂不悅因改授
司空欽若晏見上問曰卿何故不之中書對曰臣不為
宰相安敢之中書上顧都知送欽若詣中書視事謂令
設饌以待之曰上命中書設饌耳欽若既出使都知入
奏以無白麻不敢奉詔因歸私第有詔學士院降麻謂
乃除欽若使相為西京留守上但聞宣制亦不之寤也

記聞載欽若入資善堂見太子位三少上丁謂方用事
尋有詔欽若以太子太保歸班欽若袖詔書白上臣已
歸班不識詔旨上留其詔改除司空按欽若以太子太
保歸班乃天禧三年六月甲午初罷相時事此時謂猶

未入中書也若己為太子太保又令歸班則詔旨果不可曉恐謂亦不至此繆或記聞誤也改除司空今從實錄及本傳押付中書視事及為使相則

參取記聞及江休復雜志稍刪潤之

中書樞密院

言每至資善堂請皇太子無答拜詔不許

戊戌詔文武羣官使臣幕職州縣官遇雙日並門見辭謝

己亥出御製文章及賜中宮詩手書等示宰相命宰相都大管勾新修天章閣張景宗鄧守恩等提點之辛丑皇太子會師傳官官于資善堂賜教坊樂

癸卯祕書丞致仕李行簡卒其妻魏表言貧不能具葬事詔賜其家錢十萬

乙巳宴輔臣於龍圖閣以天章閣興功也

閏十二月庚戌知辰州史方言溪洞蠻知古州向光普以錢銀詣鼎州梁山觀音院僧祝聖壽

癸丑賜輔臣冊府元龜各一部板本初成也

乙卯以供備庫使錢守讓領榮州刺史右屯衛將軍劉守節為右武衛將軍西頭供奉官劉守素為東頭供奉

官閣門祇候右侍禁劉守通為西頭供奉官守讓倅之
孫守節繼元之子守素守通銀之子也上因謂輔臣曰
舊族可念錢惟演進曰陛下念舊繼絕恩逾前代惟臣
一門忠孝伏願終始保全也上曰卿一門忠孝與常人
異先帝待以殊禮朕安敢忘惟演拜謝

丁巳三司假內藏綾萬三千七百四十匹

癸亥知洋州戶部侍郎集賢院學士李維表求歸闕上
曰知河中府右諫議大夫李虛已嘗居近職亦久處外

地可并召之及至命維為翰林學士承旨虛已權御史中丞知滑州陳堯佐請令兵馬部署同管勾河隄事從之西邊多言嘉勒斯賚復作文法慮為邊患獨曹瑋奏嘉勒斯賚文法已散無足慮者朝議遣近臣察之

丁卯命龍圖閣學士陳堯咨為鄜延邠寧環慶涇原儀渭秦州路巡撫使皇城使劉永宗副之所至犒設官吏將校訪民間利害官吏能否功過以聞或有陳訴屈枉經轉運提點司區斷不當即按鞠詣實杖已下亟決遣

之徒已上飛驛以聞仍取繫囚躬親錄問催促論決
戊辰詔諸州軍自今承天及天慶等節公宴監物務官使
臣有二負處許更互一員赴會

己巳管勾編排御集入內供奉官朱允中等請以金鑄
御製御書印從之

庚午詔京城置場十四發常平倉粟賤糶以濟貧民時
許滑州入中糧儲行商輦運奔赴京師穀食踴貴故也
辛未開封民董德昌并其子利用杖脊黥面配沙門島

遇赦不還其女決杖配相州親事卒游斌朱進等決杖配潭泉澧鼎州百姓崔德升相國寺僧廷郁等決杖配隨安福州德昌利用素無賴結皇城司巡察親事卒伺人陰事詐欺取財京城民庶重足畏服至有小虫大虫之號并其黨類責之契丹遣使保靜軍節度使蕭侃副使政事舍人直樞密宋璋來賀明年正旦上久不豫前二日因餌藥泄瀉前後殿罷奏事乙亥力疾御承明殿召輔臣語其狀因諭以盡心輔導儲貳之意出手書

一幅付之其略曰朕近覺微恙發動四體未得痊和蓋
念太祖太宗創業艱難不敢懈怠急憂勞積久成此疾疹
今皇太子雖至性天賦而年未及壯須委文武大臣盡
忠翊贊自今要切時政可召入內都知會議聞奏內廷
有皇后輔化宣行庶無憂也丁謂等進曰陛下微爽康
和即當平愈況元儲已親庶政克固海內之心宮闈內
助事皆平允特寬聖慮勉近醫藥以寧祉福自是聖體
漸平凡旬浹乃復常焉時太子雖聽事資善堂然事皆

決於后中外以為憂惟演后戚也王曾說惟演曰太子
幼非中宮不立中宮非倚皇儲之重則人心亦不附后
厚於太子則太子安太子安乃所以安劉氏也惟演以
為然因以白后兩宮由是益親人遂無間三司言臣
僚奏兩川遠地所產雖富般運實多收買折科豈無虧
損織造染練寧不費工押綱衙前雖有酬獎戶下小客
最受辛勤俱荷照臨誠宜軫恤欲令益州梓州兩路州
軍綱運量與放二三分庶便民庶下三司詳定三司言

自來計度聖節端午十月一日內人春冬衣賜并準備
取索及國信往來南郊支用綾羅錦綺鹿胎透背歌正
生白大小綾花紗絹等下益梓州兩路織買出染計綱
上京令除綺三十五段全減不織外餘錦綾羅鹿胎透
背歌正生白大小綾花紗絹等欲且依舊所貴支用不
至悞闕又勘會益梓利夔路州軍每年買納紬絹絲綿
除應副陝西河東京西州軍及本路州軍衣賜支遣外
餘有剩數即上京送納元不曾椿定數目每年自西川

水路起發布帛六十六萬匹赴荆南水路轉般上京並
應副在京并京西州軍衣賜難議減省欲且依舊從之
是歲天下戶九百七十一萬六千七百一十二口二千
二百七十一萬七千二百七十二 趙德明始城懷遠

鎮而居之號興州

德明正傳載城興在李士彬斬拉爾
後不得其時按士彬斬拉爾見今年

正月因
附年未

欽定四庫全書

續資治通鑑長編卷九十七

宋 李燾 撰

真宗

天禧五年春正月丁丑朔御延慶殿見輔臣丁謂進曰
伏承聖躬已遂康復臣等不勝大慶然中外無事望寬
宵旰之憂上欣納之

辛巳宴尚書省五品諸軍都虞候已上契丹使于錫慶

院先是每歲正旦宴崇德殿時上始痊復重於煩頓故改就別館焉

壬午對輔臣於承明殿上憑几中貴人掖以升坐因言契丹益敦信好出所獻雙龍金帶示之

癸未宰臣言考較京師幕職州縣官內有合該遷秩及定差遣恩例伏緣多值假故欲具舊例擬定進內從之乙酉司封員外郎章得象直史館祕書丞程琳直集賢院前詔兩制舉詞學清素之士翰林學士劉筠龍圖閣

直學士呂夷簡知制誥張師德等以得象等名聞故召

試而命焉得象浦城人琳博野人也

得象本傳云楊億薦之召試為直史

館按實錄薦者乃無億名傳又云億以博知得象皆當考

己丑謁啟聖院太宗神御殿上自新歲不豫至是都人瞻望輿輦鼓舞相慶 詔自今每大祀中書攝事賜錢五萬為酒肴之費

癸巳以上疾稍平德音降天下死囚十惡至死官典犯入已贓劫盜放火偽造符印論如律四年秋稅殘欠並

除之權罷滑州修河

京東路水災乙未命直史館章得象閤門祇候張士安乘傳安撫

丁酉樞密直學士右諫議大夫張士遜為樞密副使依前兼太子詹事翰林學士劉筠見上久疾丁謂浸擅權歎曰姦人用事安可一日居此表求外任乃授右諫議大夫知盧州舊制學士罷職多為侍讀學士或龍圖閣學士筠但除諫議大夫謂沮之也宰相擬他官為學

士上曰皆不如李諮遂以命諮

此據馮潔已御史臺記

廢鄆州

東平監

己亥宴近臣於承明殿以天章閣興功也

癸卯上作御集聖政紀二序示輔臣

本紀不書當考

養象所

言舊管象四十六今止三頭望下交州取以足數詔知

廣州段暉規度有則進之不須宣索 詔新城外置九

廂

二月丁未召輔臣觀書龍圖閣

給事中知河陽孫奭再表求停官養父上嘉納之庚戌命知兗州奭父時居鄆州兗鄆相通故也

壬子賜新除翰林學士李諮金紫上因問宰相曰近臣中有未改章服者否丁謂曰知制誥張師德祖士衡錢易知雜御史劉晔今並衣緋即命內侍召士衡易晔賜以金紫師德時知潁州令就賜之 詔内外京朝官嘗經考課不改官自後無私罪者俟及四年並與遷轉甲寅知審刑院宋綬言得詳議官尚霖等狀諸州刑奏

並斷畢無留牘詔獎綬等仍賜緡錢宣付史館羣臣上表稱賀其後奏斷絕賜緡錢付史館如例而不常表賀上聞樞密曹利用所居西連營舍甚迫隘命內副都知鄧守恩按視隙地并詔先借宅園並賜之

丙辰以藥珠瓊玉殿上梁宴近臣於承明殿

壬戌以光祿寺丞謝絳為祕閣校理大理寺丞王質大理評事石居簡李丕諒奉禮郎李昭邁並充館閣校勘初兩制列狀薦絳等四人丕諒即三司使士衡之子士

衡上言願預校讎之職遂命諫議大夫李行簡知制誥
宋綬試之而有是命居簡中立子昭邁宗諤子也

甲子賜故太尉王旦墳側僧院名曰覺林近墳田租悉
除之

丙寅雨丁謂等稱賀上甚悅謂因請賜酺與人共樂詔
從之在京五日兩京三日諸州一日 知雜御史劉昫

上言伏以三年之喪天下之經制百行之孝人子之大
倫苟執禮以無聞在服行而有缺伏見內外京朝官丁

父母憂者不即時奔喪持服傷壞風教典章無取欲望
禁止自今官司不得妄有占留奏求追出其例當起復
者即依舊制詔益梓夔利四路長吏依舊奏裁餘官丁
憂輒有封奏求免持服者並論其罪 祠部員外郎任
中行言送伴契丹使至瀛州見路隅有暴露骸骨望官
為設奠埋瘞從之

戊辰徙客省使高州團練使知鎮州李允則知潞州永
州團練使知潞州錢惟濟知鎮州 江南西路提點刑

獄勸農使言知撫州王彬有政跡詔獎之撫民李甲饒英富於財武斷鄉曲州縣莫能制會甲從子詈縣令又人告甲語斥乘輿彬按治之索其家獲所藏兵械又得服器有龍鳳飾甲棄市并按英嘗強取人孥配隸嶺南州里肅清尋擢彬提點荆湖南路刑獄彬固始人也淳化中為雍邱尉皇城司陰遣人下畿縣刺事多動民令佐至與為賓主彬至捕鞠之悉得所賂致之法自是詔親事官無得出都城

禁親事卒出都城不得其年月今附此彬初及第已見

錄

故鳳州團練使張暉孫永德為三班借職賜束帛緡錢
永德祖母彭城縣君劉氏一百五歲後唐清泰中封邑
告身具在永德自言貧無以養故錄之

庚午以光祿寺丞孔聖佑襲文宣公知仙源縣事

癸酉幸天章閣觀上梁宴從臣賜物有差

甲戌即命陳堯咨知秦州加右諫議大夫劉承宗為鈴
轄遷西上閣門使

三月辛巳御正陽門觀酺

初磁州民張熙載詐稱黃河都部署籍並河州郡芻糧數至貝州知州內園使雷孝先覺其姦捕繫獄然孝先狡獪反欲因此為奇功以動朝廷迫司理參軍紀瑛教熙載偽為契丹謀者號景州刺史兼侍中司空太靈宮使部送京師樞密院按得孝先所教狀丙戌責孝先為潭州都監熙載決配海州瑛未得與官

戊戌天章閣成羣臣稱賀

稱賀在庚子
今并書之

命供奉官閣

門祇候張鼎率步騎五百五十人往蔡州捕賊陳堯

洛等言涇原環慶等州蕃部族帳並各安居

庚子宰臣丁謂請自今兼太子師傅十日一赴資善堂
賓客已下隻日更互陪侍講學上可之 是日奉安御

集御書于天章閣遂宴輔臣閣下

辛丑詔京畿經雨水及京東西河決壞民田者今年夏
秋稅並免十之五時章得象等使還言去秋水潦種麥
不廣若檢括之益為擾人望特減其稅故有是命得象
等又言鄆濮州遭水戶闕食望給貸之其先請食鹽望

令止納見錢徐濟州最當水衝知州王貽貞劉慶悉心
防城望降詔獎飭並從之

壬寅輔臣以天章閣成並進秩丁謂為司空馮拯為左
僕射曹利用為右僕射任中正為工部尚書錢惟演為
右丞王曾為吏部侍郎張士遜為給事中初利用止加

階邑謂等請與同遷命已下乃帖麻宣授

范鎮東齋記事云曹利用

先賜進士出身而後除僕射乃知進士之為貴也如此不知鎮何所據附傳正傳俱無之當考

皇城

使康州團練使入內都知張景宗為昭宣使領嘉州防

禦使都大管勾龍圖天章閣公事

夏四月丁未以內殿崇班雷允恭為皇太子宫都監同
管勾資善堂左右春坊司事 吏部侍郎李士衡加正
奉大夫以管建天章閣供億之勞也

先是北界蕃族隆和等來刼熟戶環慶部署田敏等率
兵與戰斬首數十級乘勝逐之俘獲甚衆都部署曹瑋
以聞庚戌詔賜敏等器帛又賜將士緡錢遞遷之

敏傳云敗

隆和於
三店川

壬子詔獎知慶州崇儀副使張舜臣舜臣密遣蕃部巡
檢李繼義部兵殺北界蕃賊舒蘇瑪勒兄索幹等十餘
人故也

舜臣或作禹臣禹臣
未見李繼義亦未見

甲寅麟府路言曲定府都虞候羅阿率衆敗蕃賊詔補
本族軍主

丙辰客星出軒轅

丁巳事材場火軍士楊勝等三人杖脊黥面配沙門島
當宿監官內殿承制石惟清削兩任贖銅二十斤勒停

不當宿監官內殿崇班閣門祇候王承僅供奉官閣門祇候張惟一並削一任勒停自餘主典軍校皆決杖降職有差勝等洎惟清當處死特貸焉

張惟一
是子

戊午皇太子生辰宴官僚輔臣于資善堂

壬戌召近臣館閣三司京府官詣天章閣觀御書御集遂宴羣玉殿知秦州陳堯咨言慶州監押係奉職而所屯軍廂主忠佐都虞候並係統攝事體非便詔三班院自今差陝西緣邊州軍監押須擇曾經邊防任使少

壯有武勇殿直以上使臣充

五月乙亥朔上御崇政殿親錄京城繫囚死罪已下並減一等遂詔諸路州軍亦如之惟十惡及官典犯賊偽造符印放火刼盜不赦

丁丑詔禮部權停今年貢舉

戊寅判河南府王欽若言澠池縣民為盜亡走禁其妻書則令衆幾三百日迫於飢寒臣已令本縣踈放知在望告示諸路有禁留令衆一季不獲正賊者責保知在

或朝廷憫其淹延止責地方巡檢縣尉耆保依限緝捕從之

癸未詔皇太子讀春秋輔臣奏曰臣等時入資善堂陪侍講席太子天安英邁好學不倦親寫大小字示臣等天然有筆法上喜曰賴卿等輔導也輔臣皆再拜

乙酉同判流內銓劉昫言幕職州縣官被舉而不改京官者多不赴銓注擬別求舉主重上薦章欲望自今比類請假即依資序注官從之

丙戌以大理寺丞通判澧州劉象中為內殿承制知辰州象中嗣其父仁霸領溪洞事蠻人畏服故因任之

丁亥滑州言開減水河功畢河流漸復北岸命右諫議大夫李行簡致祭

丁酉劔州言梓潼等縣俱當驛路請各增置主簿一員從之

己亥詔增寧化軍公用錢十萬先是河北入中芻糧諸州有多增其價者三司請令月上在市實價送入內

內侍省出付三司約所定價視其虧官之甚者而裁損之時陝西交引益賤京師才直五千有司惜其費茶於是出內藏錢五十萬貫令閣門祇候李德明於京城市而毀之

此據本志定入中價志以為四年事而不得其月因附此

辛丑令國子監重刻經書印板以本監言其歲久剝弊故也 三司使李士衡為其子奉禮郎丕旦求掌國學事上不許因詔自今國子監止差官兩員主判既而卒命丕旦同管勾國子監

差丕旦同管勾在七月丁酉今并書

是月趙德明落起復遣入內都知藍繼宗為官告使往賜之德明與繼宗射繼宗每發必中德明遺以所乘名馬

六月乙巳朔別給登州錢十萬充高麗朝貢使之費
丙午太白晝見

己酉詔自今外州監當朝官殿直以上在通判都監之下判官之上其通判與都監並依官次京官奉職借職監當者依知令錄在判官之下先是李諮知荆南上言

令禮官詳定頒下

辛亥以霖雨分遣官祈天地社稷官廟寺觀神祠京

西提點刑獄司言河南府獄空詔獎判府事王欽若

癸丑詔環州三店香溝大峴城等新寨以定邊歸遠為

名詔廣南路民訟命官不公者須本官在任及得替

未發事實干已及條詔許訴者乃得受理如已離任在

路除犯賊及私罪徒以上即委轉運提刑司體量證佐

明白非誣陷者乃得追攝自餘咸飛驛以聞時侍御史

燕肅言嶺南最處遐遠攝官校吏多務阿私命官輩順之以情則息姦糾之以法則聚怨其無良者或遭刑責或違請求伺其得替將到闕庭因犯微釁興起訟詞官司不詳事理大小即行追對往來萬里煙瘴之鄉或懼追遞便即款伏以此負譴亦可憫傷又有懼致此患務於因循者望行條約故有是詔肅益都人也嘗知臨邛縣民苦吏追擾肅削木為牘民訟有連逮者書其姓名使自召之皆如期而至

已未國子監請以御製至聖文宣王贊及近臣所撰十哲七十二賢贊鏤板詔可

辛酉出內御衣二十八萬事計其直百五十萬貫令京師寺觀設齋誦經 提點庫務司請別置內香藥庫於東華門以便宣索從之

癸亥詔獎知滑州陳堯佐堯佐浚舊河分水勢護州城有勞也

乙丑賜玉清昭應宮上座慕真大師賜紫道士劉去奢

號曰和靖先生許歸住荆南紫極觀去奢博達教典有道行上之節度荆南也以本府道正得謁見宮邸深被禮接玉清昭應宮成召令居之至是年七十餘其母年九十求歸侍奉故旌以佳號仍令就本觀時設齋醮官給所費宰執而下咸賦詩餞行

秋七月甲戌朔日有食之先是司天測儀天歷當食之既前九日上避正殿分命中使詣宮觀寺院及坊市設道場祈禱是日食四分而止司天言按唐貞元八年十

一月朔歷筭官徐承嗣言當食八分測之及三分宣示
朝堂編入史冊斯蓋聖德廣大陽盛陰潛之慶翌日宰
臣率百官詣閣門拜表稱賀

丙子謁玉清昭應宮

戊寅新作景靈宮萬歲殿為上本命祈福也 戶部副
使吏部員外郎薛奎與三司使李士衡爭事以戶部郎
中直昭文館知延州先是趙德明每遣吏至京師請俸
予因市禁物隱關美為姦利奎請留蜀道縑帛於關中

轉致給之遂絕其弊

奎傳以為趙元昊則不當在此時恐傳誤也更詳考之

參

知政事王曾自言幼孤育於季父故太子中舍致仕宗元及世母嚴氏及是改葬請追贈官封詔從之令京畿蠶鹽緣科並上納見錢以雨水害稼故也

庚辰涇原路駐泊都監王懷信言鎮戎軍界浚濠築堡寨功畢詔賜將士緡錢有差

壬辰給宰臣樞密使雜役軍士三十人參知政事樞密使副二十人皆以雄武兵充著為常例若指抽外州兵

亦聽

詔知天雄軍給事中李應機如聞臨事太峻或

失公共自今宜務酌中勿為嚴刻

應機遷給事中知天雄軍府在四年八月

庚寅

乙未判河南府王欽若言其子衛尉寺丞勾當國子監

從益改官十一年望特遷秩隨行詔授太子右贊善大

夫

欽若正傳欽若子從益終贊善大夫追賜進士及第後無子以叔之子為後在實錄賜欽若亡子衛尉寺

丞益及第在祥符六年三月獨無從字天禧四年五月又賜衛尉寺丞王從益緋五年七月遷右贊善大夫恐正傳誤以益為從益而從益乃叔之子為後者也

丙申福建轉運使言建州龍焙監通德銅場興發須錢
市銅望置便錢務聽民納錢於浙江請領從之

戊戌詔廣南都知兵馬使除廣邕桂州每三年無過即
試驗送闕下自餘滿日件析奏裁 審官院言京朝官
本貫在荆湖江浙者望比類福建淮南人許任本路官
從之

八月甲辰朔屯田員外郎知汾州李歆坐部內為僧歛
錢修寺遣伶人於官倉主納法當奪三官三任會德音

原免詔特削一任勒停

李歆未見

丙午以宰臣丁謂子光祿寺丞館閣校勘珙為太子中
允賜緋馮拯子內殿承制端已為六宅副使樞密使曹
利用子供奉官閤門祇候淵為內殿承制參知政事任
中正從子彭為侍禁王曾子奉禮郎綱為大理評事樞
密副使錢惟演子光祿寺丞館閣校勘暖為祕書郎張
士遜子將作監主簿友直為奉禮郎

此尤有故當考

戊申樞密院定皇親諸宅置船長公主二郡縣主一聽

於諸河市物免其差撥自餘不得為例

庚戌徙環慶都部署宣徽南院使鎮國軍留後曹瑋為

鎮定都部署

本傳闕此令取實錄追書為明年責萊州牧兵張本

壬子詔先減省諸州縣官送還公人令並依舊時有州

縣官任西蜀路乏騶從經涉艱難題詩驛舍詠其事承

受使臣錄以奏故有是命

元年八月一日減省

甲寅洺州團練使駙馬都尉王貽貞言諸州捕盜限外不獲其三大戶弓手典吏並行決罰伏緣典吏止行遣

文書與弓手三大戶情或不等望自今三限不獲從杖八十區斷詔可

戊午吏部流內銓言見闕判司簿尉六百四十三員其該癸巳德音至今年十二月終得替放罷合入判司簿尉人望並令赴南曹投狀從之

庚申審官院言前準詔旨新授京朝官川峽未有見闕者止令權近地監當今監當闕少望差近便知縣俟川峽有見闕即依次移補從之

辛酉馬軍都虞候武勝軍留後劉美卒贈太尉昭德軍節度使官給葬事錄其子殿中丞從德為供備庫使供奉官從廣為內殿崇班旁親遷補者數人又封美亡妻宋氏廣平縣君為河內郡夫人

丙寅樞密直學士給事中知并州馬元方丁內艱起復給假半月往潞州奔喪以其任邊寄故不俟卒哭而奪情焉環慶部署田敏言剏修緣邊七城寨畢詔獎敏等賜都監部役使臣緡帛

庚午賜近臣御集并賜天下名山寺觀

九月丙子置永康軍駐泊都監一員

戊寅涇原駐泊都監王懷信言總嚙爾嘉勒斯賚遣蕃部來
請和詔懷信答諭之懷信又言鎮戎軍去原環州約三
百里請置巡檢一員詔可

甲申命翰林學士李諮為契丹國主生辰使內殿崇班
閣門祇候王仲寶副之太常博士蘇耆為正旦使侍禁
閣門祇候周鼎副之耆尋遭母喪不行改命兵部員外

郎蘇維甫仲寶高密人

周鼎未見

先是宋綬等使還上契

丹風俗云綬等始至木葉山山在中京東微北自中京東過小河昌吉山道北奚王避暑莊有亭臺由古北口至中京北皆奚境奚本與契丹等後為契丹所併所在分奚契丹漢人渤海雜處之奚有六節度都省統領言語風俗與契丹不同善耕種步射入山采獵其行如飛凡六十里至殺獐河館過惠州城二重至低小外城無人居內城有瓦屋倉廩人多漢服七十里至榆林館前

有小河屈曲北流自此入山少人居七十里至努圖克烏
蘇館蕃語山為努圖克水為烏蘇七十里至香山子館前倚土
山依小河其東北三十里即長泊也涉沙磧過白馬淀
九十里至水泊館度土河亦云冲冲水聚沙成墩少人
煙多林木其河邊平處國主曾於此過冬凡八十里至
張司空館七十里至木葉館離中京皆無館舍但宿穹
帳欲至木葉三十里許始有居人瓦屋及僧舍又歷荆
榛荒草復渡土河至木葉山本按巴堅葬處又云祭天

之地東向設氊屋署曰省方殿無階以氊藉地後有二
大帳次北又設氊屋曰慶壽殿去山尚遠國主帳在氊
屋西北望之不見嘗出三豹甚馴馬上附人而坐獵則
以捕獸蕃俗喜罩魚設氊廬於河水之上密掩其門鑿
木為竅舉照之魚盡來湊即垂釣竿罕有失者迴至張
司空館聞國主在土河上罩魚以魚來饋是歲隆慶卒
隆慶初封常王及請盟改梁王後封秦國王及加秦晉
國王隆裕有子宗業封廣平王為中京留守改樂州幽

都縣為宛平縣其衣服之制國母與蕃官國服國主與漢官即漢服蕃官戴氍冠上以金華為飾或加珠玉翠毛蓋漢魏時遼人步搖冠之遺象也額後垂金花織成夾帶中貯髮一總服紫窄袍加義襴繫鞞帶以黃紅色條裏帶為之用金玉水晶碧石綴飾又有紗冠制如烏紗帽無簷不撮雙耳額前綴金花上結紫帶帶末綴珠或紫阜幅巾紫窄袍束帶丈夫或綠中單綠花窄袍中單多紅綠色貴者被貂裘貂以紫黑色為貴青色為

次又有銀鼠尤潔白賤者被貂毛羊鼠沙狐裘弓以皮
為弦箭削樺為韃韉勒輕簡便於馳走以貂鼠或鵝項
鴨頭為扞胥蕃官有伊勒希巴參聞國政左右林牙掌命
令特哩袞若司宗之類又有九行宮每宮署使及部署掌
領部族有永興積慶洪義昭敏等名

丙戌宰相丁謂等上箋注釋教御集三十卷詔賜謂及
翰林學士晏殊管勾使臣器幣有差羣僧賜方袍者十
四人加師號者十八度童行七人

甲午權知高麗國王事王詢遣告奏使御事禮部侍郎韓祚等百七十人來謝恩且言與契丹修好又表求陰陽地理書聖惠方並賜之

丙申權知開封府呂夷簡言獄空詔獎之

庚子以前知臨海縣事錢仙芝充館閣校勘從其季父惟演之請也

冬十月癸卯朔詔蠲開封府京東西淮南兩浙水災州軍民租

戊申祥源觀成總為屋六百一十三區都大管勾觀事
樞密副使錢惟演加工部尚書惟演詣承明殿納告敕
上不許復令中使就第賜之 昭宣使嘉州防禦使入
內都知管勾祥源觀事張景宗為宣政使內殿崇班皇
太子宫都監雷允恭內殿崇班皇太子宫祇候劉從愿
並為內殿承制入內都頭供奉官史崇信為內殿崇班
並以祥源觀功畢賞勞也仍以從愿崇信同管勾觀事
初允恭從愿嘗發周懷政天書妖妄事並擢內殿崇班

仍隸入內侍省及是當出就班列允恭欲專權利乃
紿從愿同受告牒即密請回新命褒封其世母遂獨得
仍舊入禁中傳宣取庫物皆不待文據即給付之從愿

承珪子也

允恭先為太子宮都監後乃加承制仁宗實錄附傳叙其事則以後為先今不取實錄云

允恭自是作邪愿矣按允恭邪愿非自是始今削去

詔獎淮南江浙荆湖發運

使周實以其自春至冬運上供米凡六百餘萬石故也

審刑院詳議官國子博士尚霖言奉詔往陝西規畫
入中芻糧其入中比遞年一倍已上者請許監官書歷

為課從之 知應天府張知白言通判秘書丞任中師
臨事明幹究民利病有詔褒獎中師中正第也

壬子輔臣以上違豫浸久上表引漢宣帝唐高宗故事
請五日一御便殿及朔望坐朝春秋大宴及賜羣臣會
並止就錫慶院如有軍國大事即非時召中書樞密院
參決其隻日資善堂議事及雙日中書樞密院早入並
如舊又請自今慶節上壽皇太子押文武班悉從之

左領軍衛大將軍石普妻表求授小郡上不許乙卯詔

給普月俸實錢仍與添支發運使周實言陝西入中芻糧甚少淮南茶貨停積望令三司再定商旅筭買交引以便公私從之實又言監當場務官得替須批書一界課利增損畢方聽發遣赴闕從之

十一月丁丑以司空兼門下侍郎太子少師平章事丁謂為譯經使兼潤文時譯經三藏法護等請依唐制命宰臣充使故也

甲申山南東道節度使同平章事判河南府王欽若有

疾詔遣中使將太醫診視先是欽若累表請就醫京師
未報丁謂密使人紿欽若曰上數語及君甚思一見君
第上表徑來上必不訝也欽若信之即令其子右贊善
大夫從益移文河南府輿疾而歸謂因言欽若擅去官
守無人臣禮命御史中丞薛映就第按問欽若惶恐伏
罪戊子責授司農卿分司南京奪從益一官轉運使及
河南府官皆被罪仍頒諭天下

乙未詔自今羣臣受命免赴告謝 詔僧尼道士女冠

文武七品以上者有罪許減贖當還俗者自從本法

丁酉契丹遣左監門衛上將軍蕭善副使給事中程翥
來賀承天節

十二月乙巳以內殿崇班皇甫繼明同勾當三館秘閣
公事咸平中初命劉崇超監三館秘閣圖籍其後因循
與判館聯署掌事時論非之崇超素與王欽若厚善丁
謂為相惡之別用繼明以分其權更號監圖籍曰勾當
公事自是內臣遂與大學士同職時論愈非之

祥符八年十二

月劉崇起始
朕署掌事

丙辰以愆雪遣官分禱官廟寺觀

壬戌徙知應天府翰林侍讀學士兵部侍郎張知白知
亳州初知白在中書與王欽若不協於是欽若分司南

京丁謂欲知白修怨也已而知白待欽若加厚謂怒故

徙之

實錄云徙知白之請恐誤也本傳云欽若分司南
京丁謂素惡欽若因自天雄徙知白于應天使得

報怨知白不從其意又徙亳州按知白徙應天實與王
曾兩易乃三年九月辛未此時欽若猶在杭州傳亦悞
也其又徙亳州則本傳得之
今稍加刪潤使不相抵牾

癸亥上作歌賜皇太子獎其書翰日進也

戊子契丹遣使保安節度使蕭堯袞副使利州觀察使
韓紹昇來賀明年正旦

是歲契丹改年曰太平

開泰盡九年

天下戶八百六十七

萬七千六百七十七口一千三百九十三萬三百二十
所收租稅比至道末穀增一百七萬五千餘石錢增二
百七十萬八千餘貫絹減萬餘匹紬減九萬二千餘
匹布增五十萬六千餘匹絲線減五萬五千餘兩綿減

一百一十七萬五千餘兩茶增一百一十七萬八千餘斤芻茭減一千一百萬五千餘圍蒿減一百萬餘圍炭減五十萬四千餘秤鵝翎雜翎增十二萬九千餘莖箭幹增四十七萬隻黃蠟增五萬餘斤又鞞八十一萬六千餘量麻皮三十九萬七千餘斤鹽五十七萬七千餘石紙十二萬三千餘幅蘆簾三十六萬餘張大率名物約此其折變及移輸比壤者視當時所須焉至道末上供錢一百六十九萬二千餘貫金一萬四千八百兩銀

三十七萬六千兩絲七十萬五千兩綿四百九十七萬
兩紬三十七萬九千匹絹一百七十萬八千匹絕五萬
二千匹布一百一十萬六千匹又權利所獲總一千一
百二十三萬三千餘貫國家率三歲一親郊祀共計緡
錢常百五十餘萬貫大半以金銀綾綺絕絹平其直而
給之大凡邦國內外舉一歲之費錢一千六百九十三
萬餘貫金一萬四千八百七十兩銀六十二萬餘兩絹
三百三十三萬三千餘匹紬九十萬三千餘匹絕五萬

九千餘匹綿七百四十五萬兩絲線一百六十四萬兩
布二百六萬三千餘端粟二千一百九十四萬石芻二
千二百萬六十圍舉一歲京城給文武官三班使臣及
諸司人等奉錢四萬五千八百餘貫給以他物者九萬
一千四百餘貫祿粟五萬一千餘石糧五十四萬二千
餘石騎軍一歲給錢六十八萬餘貫都虞候已上祿粟
一萬四千餘石糧一百一十八萬餘石步軍一歲給錢
七十一萬餘貫祿粟七千八百餘石糧一百八十二萬

九千餘石大抵若此而亦有盈縮焉天禧末上供惟錢
帛增多餘以移用頗減舊數而天下總獲錢二千六百
五十三萬餘貫金萬四千四百餘兩銀八十八萬三千
九百餘兩絲四百一十七萬二十餘兩綿一千八百九
十九萬一千餘兩絹一百五十五萬二千餘匹紬九百
四十一萬五千餘匹綾三十四萬四千餘匹純一十三
萬七千餘匹紗縠二萬五千餘匹綿綺二萬八千餘匹
布三百五萬七千餘匹茶七十六萬餘斤鹽一十六萬

三千八百餘石香藥真珠犀象七十餘萬斤條片顆竹
木蔭箔三百六十餘萬條片五穀二千九百八十三萬
餘石草三千萬餘圍木炭薪蒿三千餘萬斤束總費錢
二千七百一十四萬餘貫金一萬三千五百餘兩銀五
千八萬餘兩絲三百六十三萬二千餘兩綿一千六百
五十萬餘兩紬七十六萬四千餘匹絹四千一百七十
三萬七千餘匹綾十萬七千餘匹絕五萬二千餘匹羅
二萬七千餘匹紗縠一萬一千餘匹綿綺六千七百餘

匹布一百二十九萬七千餘匹茶三十六萬六千餘斤
鹽十一萬八千餘石香藥真珠犀象五十二萬三千餘
斤條片顆竹木蔭箔一百二十三萬二千餘條片五穀
三千四百五十八萬二千餘石草三千四百五十八萬
三千餘圓木炭薪蒿四百五十萬餘斤東景德郊祀七
百餘萬東封八百三十餘萬祀汾陰上寶冊又增二十
萬丁謂為三司使嘗著景德會計錄以獻林特領使亦
繼為之凡舉大禮有司皆籍當時所費以聞必有優詔

獎焉 鹽有二類引池而化者周官所謂鹽鹽也今謂之顯鹽或煮海或煮井或煮醃而成者周官所謂散鹽也今謂之末鹽引池為鹽曰陝西解州解安邑兩池墾地為畦引池沃之水耗鹽成籍州及旁州民給役謂之畦戶總三百八十戶復其家戶歲出夫二謂之畦夫歲給戶錢四萬日給夫米二升歲二月墾畦四月引池為鹽八月而止募兵百人目為護寶都以巡邏之煮海為鹽曰京東河北淮南兩浙福建廣南凡六路其煮鹽之

地曰亭場民曰亭戶或謂之竈戶有鹽丁歲課入官

受錢或折租賦兩浙又役軍士煮馬在京東曰密州登

州三朝志但載密州濤洛場歲煮三萬二千餘石兩朝志又增登州今從兩朝志而並不書鹽數蓋兩志數

亦不同也河北曰滄州濱州三朝志亦無滄州淮南曰通泰楚海州

連水軍兩浙曰抗秀溫台明五州福建曰福漳泉三州

興化軍三朝志無漳泉興化廣南曰廣潮惠廉化瓊崖儋萬安九

州三朝志潮州廢於雍熙四年兩朝志仍有之兩朝志有化州三朝志無之三朝志又有高竇春雷融五州

兩朝志乃無之煮井則川峽西路大為監小為井監則置官井

則募土民或役衙前主之益州路則陵綿邛眉簡嘉雅

漢八州

兩朝志無漢州今從三朝志

梓州路則梓資遂合戎榮果普

昌渠瀘十一州富順監

三朝志無合戎榮渠四州疑本或脫略也

利州路則

閬州夔州路則夔忠達萬黔開渝七州雲安軍大寧監

三朝志無渝州

煮鹽則河東并州之永利監凡顆鹽末鹽皆以

五斤為斛顆鹽賣價每斤自四十四至三十四錢有三

等末鹽賣價每斤自四十七至八錢有三十一等至道

末賣顆鹽錢七十二萬八千餘貫末鹽一百六十三萬

餘貫云

錢幣之制有銅鐵二等凡鑄銅錢有四監饒州曰永平
池州曰永豐江州曰廣寧建州曰豐國每千錢用銅三
斤十四兩鈔一斤八兩錫八兩成重一斤惟建州增銅
五兩減鈔如其數至道中歲鑄八十萬貫景德末至一
百八十三萬貫大中祥符後銅坑多不發天禧末鑄一
百五萬貫鑄鐵錢有三監邛州曰惠民嘉州曰豐遠興
州曰濟衆益州雅州舊有監後廢之大錢貫重十二斤

十兩以準銅錢歲鑄總二十一萬餘貫銅錢行於天下

鐵錢止於川峽凡產金有商饒歙撫四州南安軍

兩朝

志有登萊商饒汀五州却無歙撫南安

產銀有桂陽開寶龍焙三監五

十一場在饒虔信建昌越衢處道福漳河南劍邵武南

安廣韶連英南恩春秦興元等州軍府

兩朝志無處道廣南恩興元五

州府却增陝號商隴并衛泉七州

產銅有三十五場在饒處建英信

南安汀漳邵武南劍等州軍又一務曰梓州之銅來

兩朝

志增虔泉韶三州却無處州南安軍

產鐵有四監曰徐州之大通利國

兗州之萊蕪相州之利成萊蕪廢於大中祥符七年又

河南鳳翔號同儀斬黃袁英州興國軍有十二冶晉磁

鳳澧道渠合梅陝耀坊虔吉汀州有二十務信鄂建連

南劔邵武等州軍有二十五場兩朝志無河南同黃晉道梅耀坊鄂九州府却

增登萊泉資四州產錫有九場在河南之長水及虔南康道

賀潮循等州軍兩朝志增商號二州却無長水及南康軍產鉛有三十六

場在衢越建南安英春韶汀漳南劔邵武等州軍兩朝志無

建州南安軍漳州却增信州連州水銀四場在秦階商鳳州兩朝志云五場

朱砂二場在商宜州

三朝志云三場其稱富順監者誤今從兩朝志

至道

末天下歲課金若干兩

此數當求別本三朝史志偶脫

銀十四萬五千

餘兩銅四百一十二萬餘斤鐵五百七十四萬八千餘

斤鈐七十九萬三千餘斤錫二十六萬九千餘斤天禧

末金一萬兩銀八十八萬二千餘兩銅二百六十七萬

五千餘斤鐵六百二十九萬三千餘斤鈐四十四萬七

千餘斤錫一十九萬一千餘斤水銀二千餘斤朱砂五

千餘斤然金銀除坑冶丁稅和市外課利折納互市所

得皆在焉 至道中兩京諸州收榷酒歲課銅錢一百
二十一萬四千餘貫鐵錢一百五十六萬五千餘貫京
城賣麴錢四十八萬貫天禧末榷課銅錢七百七十九
萬六千餘貫鐵錢增一百三十五萬四千餘貫賣麴錢
增三十九萬一千貫關市津渡等稅至道中獲錢四百
萬貫天禧末增八百四萬貫

--	--	--	--	--	--	--	--	--